

海南先贤诗文丛刊
海南地方文献丛书编纂委员会编纂

丘濬集

第七册

(明) 丘濬 著

海南出版社



海南先贤诗文丛刊
海南地方文献丛书编纂委员会汇纂

主 编 洪寿祥
执行主编 周伟民

丘濬集

第七册

(明) 丘 濬 著

周伟民 王瑞明 点校
崔曙庭 唐玲玲



海南出版社



世史正纲 卷二十二

五季世史

唐亡之后，相继而起者五姓，所谓梁、唐、汉、晋、周是也。自宋人作《五代史》，世因称之为五代。夫谓之代者，必继世之长，历十数世也；五姓僭乱，歟起忽灭，甚至继世止有二主，历年仅见四稔，较之有周一代八百年之长何如哉！同以代称，似非其伦。今因朱子《大学章句序》中语，改称五季云。

戊辰（ ）〔晋岐淮南称唐天祐五年，梁主晃开平二年，蜀王建武成元年，吴越王钱镠天宝元年〕

晋王李克用卒，子存勖嗣。

朱晃弑其故主。

晋王存勖攻梁夹寨，破之，潞州围解，归晋阳，始承制封拜。

淮南张颢、徐温杀其节度使杨偓，温复杀颢。

蜀、岐、晋会兵攻梁雍州。

淮南将吏推杨隆演为节度使。

华原贼帅温韬发唐诸陵。

己巳（ ）〔晋岐淮南称唐天祐六年，梁开平三年，蜀武成二年〕

新加坡
PDG

春，二月朔，日有食之。

梁兵攻岐。

梁以王审知为闽王。

刘守光执其兄守文，寻杀之。

梁以刘守光为燕王。

淮南尽取江西地。

庚午（ ）〔晋岐吴称唐天祐七年，梁开平四年，蜀武成三年〕

楚王殷自为天策上将军。

岐、晋合兵攻梁夏州。

吴越筑捍海塘，广杭州城。

钱唐自是始富庶。

淮南杨隆演称吴王。

晃遣兵袭据赵、深、冀三州，进军镇州，晋王合义武等三镇兵救之。

辛未（ ）〔晋岐吴称唐天祐八年，梁乾化元年，蜀永平元年〕

春，正月朔，日有食之。

晋王讨朱晃，大破其兵于柏乡，河朔大震。

清海节度使刘隐卒，弟岩知留后。

晋王推刘守光为尚父。

朱晃淫乱于其臣张全义家，全义子继祚欲杀之，不果。

梁屯兵邢州，赵王镒会晋王于承天军。

刘守光称帝于燕。

晋遣使如燕。

幽州参军冯道奔晋。

壬申()〔晋岐吴称唐天祐九年,梁乾化二年,蜀永平二年〕

晋师及镇定兵伐刘守光,朱晃救之,大败还。

朱晃子友珪杀晃。

忠武军乱,杀韩建。

梁朱友谦以河中附晋。

癸酉()〔晋岐吴称唐天祐十年,梁乾化三年,蜀永平三年〕

晋拔燕、顺、蓟等州。

梁均王友贞起兵讨友珪,诛之,友贞立于大梁,更名瑱。

晋师逼幽州,拔平、营州。

梁击赵以救燕。

蜀以道士杜光庭为谏议大夫。

高季昌受梁封爵为渤海王。

晋王入幽州,执刘仁恭及守光以归。

梁遣兵侵吴。

甲戌()〔晋岐吴称唐天祐十一年,梁主瑱元年,仍称乾化四年,蜀永平四年〕

晋王诛刘守光,械仁恭祭其先王墓,斩之。

赵王镒推晋王为尚书令,始置行台。

晋伐梁邢州。

南诏侵蜀。

乙亥()〔晋岐吴称唐天祐十二年,梁乾化五年十一月,贞明元年,蜀永平五年〕

梁分天雄为两镇,魏人降晋,晋王入魏,斩军校张彦。

晋拔梁德、澶州。

吴徐温出镇润州,留子知训江都辅政。

梁朱友敬作乱,诛之,自是疏忌宗室。

广南与梁绝。

蜀攻岐、阶、成等州。

丙子()〔晋岐吴称唐天祐十三年,梁贞明二年,蜀通正元年,契丹耶律阿保机天门元年〕

吴将马谦等起兵讨徐知训,不克而死。

梁刘鄩攻晋魏州,晋王击败之。

梁遣兵袭晋阳,晋击却之。

晋克梁、卫、磁、洺州。

梁戍卒作乱,攻宫门。

梁以吴越王鏐为诸道兵马元帅。

晋拔梁相、邢等州。

契丹侵晋,入蔚州。

晋王遣使如吴。

楚王遣使如晋。

契丹阿保机僭号于其境。

呜呼!自春秋以来,夷狄之祸,盖三变矣。始也,吴楚之类,以中国之人,居夷狄之地,以僭中国之分,一变也;中也,渊、勒之徒,以夷狄之人,生中国之地,以为中国之害,再变也;至是契丹,则是以夷狄之人,生夷狄之地,以戕中国之人,岂非三变乎?其祸愈流而愈,愈远而愈大,履霜坚冰,至圣人逆睹其然,知其祸必将至于冠履倒置,以敦败我彝伦也。《春秋》之作,不少假借于吴、楚、徐、越之称王,其意岂不深切而著明哉!

契丹始用中国人韩延徽为相。

呜呼！夷狄不能为中国害也，所以为中国害者，中国之人也。是故匈奴之为汉害者，以中行说也；西夏之为宋害者，以张元、吴昊也。方契丹之初起也，阿保机之为，性虽悍鸷而无远大之谋，心虽变诈而无经久之计，一旦得刘守光所使之韩延徽教之，以建牙开府，筑城郭，立市里，以处汉人；使各有配偶，垦艺荒田，用中国之法，以变夷狄之习。凡吾中国自古以来所以立国者，因事教之，俾其假中国之法侵中国之地，用中国之人为中国之害，遂貽中国无穷之祸患。向使吾中国之关隘有禁，而吾之人无由以至其地，中国之人才无遗，而吾之人不暇以为之用；彼肆其鸷猛之力，桀骜之智，虽能为吾近边一时之害，不旋踵而息灭矣，岂能侵入持久以得志于吾中国哉！是以善于防患者，恒于无事之时，未然之始，严谨边关之出入，收拾遗逸之人才。

丁丑（ ）〔晋岐吴称唐天祐十四年，梁贞明三年，蜀天汉元年，南汉主刘岩乾亨元年〕

契丹围晋幽州。

吴徐温徙治升州。

刘岩称越帝于广州，寻改称汉。

晋遣将败契丹，幽州围解。

梁以吴越王鏐为天下兵马元帅。

晋王袭梁杨刘拔之。



戊寅()〔晋岐吴称唐天祐十五年,梁贞明四年,蜀光天元年,南汉乾亨二年〕

夏,六月,蜀主建卒,子宗衍立。

吴朱瑾杀徐知训而自杀。

吴徐温以养子知诰为淮南行军副使辅政。

晋王高举伐梁。

梁泰宁节度使张万进降晋。

晋王与梁军战于胡柳陂,周德威败死,晋王收兵复战,大破梁军。

己卯()〔晋岐称唐天祐十六年,梁贞明五年,蜀王衍乾德元年,南汉乾亨三年,吴王杨隆演武义元年〕

晋以郭崇韬为中门副使,掌机务。

吴王隆演建国改元。

梁攻晋德胜南城,不克。

晋王以冯道掌书记。

吴与吴越连和。

梁以王瓚为招讨使,与晋王战败绩,以戴思远代之。

庚辰()〔晋岐称唐天祐十七年,梁贞明六年,蜀乾德二年,南汉乾亨四年,吴武义二年〕

梁朱友谦以河中降晋。

吴王隆演卒,弟溥嗣。

辛巳()〔晋岐称唐天祐十八年,梁龙德元年,蜀乾德三年,南汉乾亨五年,吴王溥顺义元年〕

晋王命有司造法物,欲称帝,唐监军使张承业哭谏成疾。

赵王镒为其下所杀。

夏，六月朔，日有食之。

王处直为其假子所囚死。

契丹拔晋涿州，进侵义武。

壬午（ ）〔晋岐称唐天祐十九年，梁龙德二年，蜀乾德四年，南汉乾亨六年，吴顺义二年，契丹天宝元年〕

晋王大败契丹于新城。

梁袭晋魏州，不克。

梁取晋卫州。

晋王克镇州。

唐宦者特进、河东监军使张承业卒于晋。

癸未（ ）〔岐称唐天祐二十年，梁龙德三年，唐主存勖同光元年，蜀乾德五年，南汉乾亨七年，吴顺义三年〕

梁以钱镠为吴越王。

晋王存勖称帝于魏州，国号唐。

唐以豆卢革、卢程同平章事，郭崇韬、张居翰为枢密使。

唐立庙祀唐高祖、太宗、懿宗、昭宗。

唐遣李嗣源袭梁，取郢州，以嗣源为节度使。

梁敬翔荐王彦章为招讨使，彦章攻唐德胜南城，拔之，进攻杨刘，唐主救之，梁兵退。彦章寻以谏罢。

梁取唐泽州，裴约死之。

梁将康延孝奔唐。

冬，十月朔，日有食之。

唐主救郢州，梁师败绩，王彦章死之，唐主入大梁，梁主巴自杀，唐遂灭梁。〔是岁梁亡，二主十七年。〕

唐主責梁宰相鄭珣等十一人，世受唐恩而仕梁，貶之。

唐主詔數敬翔、李振等佐朱溫傾唐祚罪，誅之，夷其族。

唐追廢朱溫、朱友貞為庶人。

梁藩鎮入朝于唐者，皆復其任。

唐以郭崇韜為侍中。

唐主欲斫朱溫棺，焚其尸，以溫故臣張全義言而止。

唐加李嗣源中書令。

楚王殷遣使入貢于唐。

吳遣使如唐。

彗星見與鬼。

溫韜入朝，郭崇韜發其發陵之罪，請誅之，唐主以經赦免之。

胡寅曰：“罪人不可不誅，赦令不可不守，二者將何處？必于未赦之前，揆情法，審輕重，而區別之。使預赦者，无可誅之罪；被刑者，无可恕之人。則一舉而兩得矣。”

唐省文武官。

唐以趙光胤、韋說同平章事，豆盧革判租庸，兼監鐵轉運使。

荆南節度使高季興朝于唐。

唐復以長安為西京京兆府。

唐遷都洛陽。

吳復遣使如唐。

甲申（ ）〔岐稱唐天祐二十一年，唐同光二年，蜀乾德六年，南漢乾亨八年，吳順義四年，吳越寶大元年〕

契丹入唐幽州。

岐王茂贞遣使入贡于唐。

唐复以宦者为内诸司使及诸道监军。

唐以王正言为租庸使。

唐主大赦境内，寻复征所赦租税。

唐以李茂贞为秦王，寻卒。

茂贞书卒者，以其不忘本朝，称天祐年也。

唐郭崇韬请立夫人刘氏为后。

按：张耒曰：“自古大臣，权势已隆极，富贵已亢满，前无所希，则必退为身虑；然其为虑也，思之非不深，计之非不工，然异日衅之所起，往往又自夫其至深至工者焉。是故人之处心行事，莫若以正，夫正者，无所事计也，行所当然而已。”郭崇韬佐庄宗决策灭梁，遂一天下，自见功高权重，奸人议己，而庄宗之昏为不足赖也，乃为自安之计。时刘氏有宠，庄宗嬖之，因请立为后，用是以中庄宗之欲，结刘氏之援，其为计宜无如是之良者，然卒之杀崇韬者刘氏也。呜呼！正之一言，其真万世人臣处心行事之要乎！

唐遣使按视唐诸陵。

唐遣客省使李严如蜀。

唐贷民钱。

唐以伶人为刺史。

唐以李嗣源为宣武节度使、番汉马步总管。

唐以孔谦为租庸使。

吴越入贡于唐。

蜀遣使如唐。

唐刘后以父事河南尹张全义，帝偕后幸其第。

乙酉（ ）〔唐同光三年，蜀成康元年，南汉白龙元年，吴顺义五年〕

唐以李嗣源为成德节度使。

汉遣使如唐。

夏，四月朔，日有食之。

唐主亲帅后妃拜五台僧诚惠，既而诚惠祈雨不应，遁死。

唐遣魏王继岌及郭崇韬将兵伐蜀。

蜀主东游。

蜀主王衍降唐。〔是岁前蜀亡。二世三十五年。〕

唐以董璋为东川节度使。

唐郭崇韬诛蜀奸臣王宗弼、王承休，蜀人食其肉。

闽王王审知卒，其子延翰嗣。

唐以孟知祥为西川节度使。

唐遣宦者马彦珪使蜀军，刘后自为教与继岌，令杀崇韬。

楚铸铅铁钱。

以铅为钱，始见于此。

丙戌（ ）〔唐同元四年四月以后李嗣源天成元年，南汉白龙二年，吴顺义六年，吴越宝贞元年，契丹德光天显元年〕

唐魏王继岌杀招讨使郭崇韬。

唐邺都乱，遣李绍荣攻之，不克。

唐李绍琛反于蜀，寻擒之，孟知祥讨定馀寇。

唐主遣李嗣源将亲军讨邺都，亲军作乱，劫嗣源入城，嗣源奔相州。

唐豫借河南夏秋税。

呜呼！横敛厚征，治天下之大蠹也；所以失人心者在是，所以促国脉者在是，然犹未至于豫借之甚者也。方其行横敛厚征之法也，天下之民，虽怨咨愁蹙，然犹归咎于上之人用非其人，取非其道，幸其一旦更之，尚可以为生也。惟豫借之令一行，示天下以国储之虚，国用之竭，国计之穷；天下之人哗然，谓天下不复可为，而生其泮涣离散之心者，未必不自此也。掌国计者其谨之哉！

唐李嗣源反，引兵向大梁。

按：《纲目》于李嗣源多恕辞，亮其无利之之心也。《史纲》乃从欧阳氏《五代史》书其反何？明君臣之大义也。方张破败劫嗣源入城，得间出宿魏县，奔相州时，而书其反，是诬之也。若夫听石敬瑭之计，急赴汴州，令安重海移檄会兵，欲何为哉？及嗣源在汴，唐主至万胜镇，君臣相望仅数十里间耳，苟无反心，胡不遣腹心之使，陈忠赤之词，明其为元行钦所隔绝，安知唐主不亮其心也哉！况大梁，天子之城，乃公然占而据之，车驾将至，不行逊避；及其返也，又以兵踵之而西；其意果何在哉？谓其无利之之心，愚不敢以为然也。《五代史》以反书之，夫岂过哉！然通以一反辞该之，则似乎无所分辨，故《史

纲》于前书亲军劫其入城；至是入大梁，始以反书焉。或曰：嗣源非有篡国之心，争帝之意，偶为乱兵所劫，奸臣所逼，迫于逃死，进退惟谷，盖有不得已焉耳。呜呼！春秋无将，将则必诛。兹何等事，而可以不得已而不已哉！然则为嗣源计，将奈何？方其出宿魏县之时，听安重诲之言，束身单骑，由间道星行赴阙，面陈其被劫之状，伏地俟罪，元行钦虽欲间之，胡可得耶。又不然，得李绍真五千之兵，即整肃部伍，申明号令，移檄远近，以明本心，返旆直抵邺城，期缚赵在礼以献阙下，虽所奏之辞沮而不达，而所行之事足以自明，百元行钦不能间之矣。计不出比，乃陷于篡逆之罪，惜哉！

唐主如关东，李嗣源入大梁，唐主乃还。

夏，四月，唐伶人郭从谦弑其主存勖、李嗣源入洛阳。

唐太原军乱。

唐李嗣源监国，以安重诲为枢密使。

唐元行钦出奔被执，李嗣源杀之。

唐李嗣源弑刘后，杀诸王。

唐李嗣源废租庸使及诸道监军。

唐魏王继岌至长安，自杀。

李嗣源自称唐帝。

《纲目》于非正统之君，其子嗣位书立。嗣源立，非唐主意，而以唐主立书之，岂非以嗣源于五代主中之彼善于此，故恕之欤！《史纲》于此不书其立，而以称帝书，以

明其不得以嗣庄宗之位也，况前既书其反乎！何则，五常之中，君臣独谓之义，臣之事君独谓之忠，义者断制之宜，忠者心无不尽之谓也。嗣源本夷种，李克用养以为子，赐以姓名，附之属籍，庄宗嗣位，委以重任，付以兵权，君臣之分素定，一旦为乱兵所胁，不得已而入乱城，幸而以计得出，单骑归朝，明其本心可也，却乃回翔不进；及夫车驾东出，又不即赴行在，趋拜道左，公然拥兵亟趋汴州以争先夺利；车驾之还，又不扈送，且以兵踵之，所谓断制之义，尽心之忠，安在哉？假使嗣源之心，实出避祸，一闻庄宗被弑，当日扬旗西指，以计罪人，传檄四方，遣使四迎魏王，奉请刘后临朝，以俟嗣君之至。顾乃遽然居太子监国之位，布置私人以掌枢机，杀害国母以及亲王。魏王闻之，安得而不自杀！虽曰自杀，其与嗣源杀之也无异，此《史纲》所以书其反，又书其称帝，以明明宗实非沙陀之种类，而于庄宗之义则已绝矣。或曰：《史纲》亦有所据欤？曰：观明宗欲杀元行钦，责之曰：我儿何负于尔？行钦瞋目直视之曰：先帝何负于尔？欧阳子谓行钦诚节有足嘉者，则明宗逆节有足恶者，不言可知矣！不特此也，《纲目》引胡氏论李琪谏改国号，臣心不安之言，亦谓国亡君弑，子不得立，而他人是保，是亦不满于明宗之立也。史虽委曲为之开说，若明宗有若不得已焉者。呜呼！史岂皆实哉！按：《庄宗实录》，明宗时，宰相赵凤修；《明宗

实录》，潞王时，宰相姚顗修。至宋薛居正等采以为正史。司马公又据正史以为《通鉴》，其所书者，果得其实否乎？虽然，其明白昭著者，亦自有不容掩焉者。欧阳氏作史时去五代未远，其必有所据矣夫！

唐大赦，省官人、宦官、伶官，废内藏库，四方所上物，悉归有司。

唐复假子本生姓名。

唐初令百官转对。

百官转对，始见于此。

唐选文学臣，以冯道、赵凤为端明殿学士。

唐遣使如契丹。

契丹阿保机死，子德光立。

秋，八月朔，日有食之。

唐初赐百官春冬衣。

王延翰自称闽王，寻为王延禀所弑，而立其弟延钧。

丁亥（ ）〔唐天成二年，南汉白龙三年，吴乾贞元年〕

唐主更名亶。

唐以赵在礼为邺都留守，皇甫晖为秦州刺史。

启邺城之乱者皇甫晖，而成其乱者赵在礼也。庄宗之祸，自晖始而在礼成之。明宗果无利之之心，即位之后，即当以二人肆诸市朝，庶以少白此心。顾乃首擢在礼为义成节度使，其不受命，又以为邺都留守；晖自军卒即擢秦州刺史。由是观之，《五代史》所谓明宗至邺，军变，

因入城与在礼合谋者，岂卢语哉！

唐以冯道、崔协同平章事。

唐初令长史每旬虑囚。

唐孟和祥杀监军李严。

唐以逆贼郭从谦为景州刺史，寻诛之，夷其族。

唐以石敬瑭为六军诸卫副使。

唐初置监牧。

唐以马殷为楚国王。

唐主如汴州，宣武节度使朱守殷反，唐主遣兵讨之，遂遣使杀任圜，守殷自杀。

唐免三司逋负二百万缗。

唐以石敬瑭为侍卫亲军都指挥使。

吴王杨溥称帝。

有年。

戊子（ ）〔唐天成三年，南汉大有元年，吴乾贞二年〕

春，二月朔，日有食之。

吴遣使如唐，不受。

唐王都反，遣王晏球讨破之，契丹复遣兵来救，晏球击走之，擒其将惕隐。

唐以王延钧为闽王。

契丹遣使如唐。

温韬、段凝伏诛。

己丑（ ）〔唐天成四年，南汉大有二年，吴大和元年〕

唐王晏球克定州，诛王都，并获奚酋秃馁斩之。